

Ndoto ya Bima ya Afya kwa Wote yatimia



**Mhe. Rais Dkt. Samia
aelezea manufaa yake
kwa wananchi**

**Aelezea uwekezaji
uliofanywa na Serikali
katika Sekta ya Afya**

**NHIF yasema iko
tayari na imejipanga
kutekeleza, yampongeza
Rais Dkt. Samia**

Kwa umuhimu huo, Serikali ya awamu ya sita chini ya Mhe. Rais Dr. Samia Suluhu Hassan imeweka kipaumbele katika uwekezaji katika Sekta ya Afya hususan katika ujenzi wa vituo vya afya, ukarabati wa miundombinu na vifaa tiba vya kisasa na rasilimali watu hivyo kuwezesha upatikanaji wa huduma bora za matibabu kwa wananchi nchini.

Na Mwandishi Wetu,

Kuna usemi unaosema "Afya ni mtaji" na katika usemi huu unaweza ukauona ukweli wake moja kwa moja kwa kuwa hakuna mwananchi yeyote anayeweza kushiriki shughuli za maendeleo ya uchumi wa kifamilia na Taifa kwa ujumla bila kuwa na afya njema.

Uhakika wa upatikanaji wa huduma za matibabu kwa nchi yeyote ni kiashirikia kikubwa cha maendeleo ya nchi husika kwa wananchi wake kupata huduma bila ya kikwazo cha kifedha. Mfumo wa Bima ya Afya ni wa kisasa unaomwezesha mwananchi kupata huduma za matibabu wakati wowote anapozihitaji bila kuwa na kikwazo cha kifedha.

Hivi karibuni Mhe. Rais akiwa katika ziara Mikoa ya Katavi, Rukwa na Songwe, amesikika mara nyingi akiwahamasisha wananchi kujiunga na Bima ya Afya ili waondokane na kukosa huduma za matibabu kutokana na kikwazo cha kifedha.

Kwa hatua yake kama kiongozi wa nchi, amefanikiwa kuandaa mazingira bora ya upatikanaji wa huduma za matibabu kwa kuelekeza fedha nyingi katika sekta ya afya hivyo wajibu unabaki kwa wananchi kuchukua hatua stahiki ya kujiunga na bima ya afya.

Miongoni mwa juhudi hizo ni pamoja na hatua ya kupitishwa kwa sheria ya Bima ya Afya na kusainiwa ambayo inamtaka kila mwananchi kuwa ndani ya mfumo huo katika kupata huduma za matibabu.

Aidha, kitendo cha kila mwananchi kuwa ndani ya mfumo wa bima ya afya kitasaidia kupata huduma stahiki, kuepuka vifo vinavyoweza kusababishwa na kushindwa kumudu gharama za matibabu pamoja na kujiepusha kuingia katika lindi la umasikini kwa kuuza mali ili kupata fedha za kulipia gharama za matibabu.

Kupitia sheria hiyo ya bima ya afya kwa wote, imeweka utaratibu wa kugharamia huduma za matibabu kundi la watu wasio na uwezo kupitia mfumo wa bima ya afya baada ya utambuzi na usajili wa wananchi watakaokidhi vigezo ili kuhakikisha uhakika wa matibabu kwa kundi hilo la wananchi bila kikwazo cha kifedha.



Serikali katika Bajeti yake ya Mwaka 2024/2025 tayari imeainisha vyanzo vya mapato vitakavyogharamia kundi hilo hivyo utekelezaji wake kuwa na matumaini makubwa zaidi.

Mheshimiwa Rais Dkt.Samia amesema, Serikali imedhamiria kupeleka huduma bora za afya karibu na wananchi kwa kufanya uwekezaji katika hospitali zote nchini.

"Na tunaendelea kuweka mifumo madhubuti ya vyanzo vya uhakika vya fedha ili kutekeleza Bima ya Afya kwa Wote kwa wale wasiokuwa na uwezo kabisa, tutaweka utaratibu mzuri.

"Serikali inatumia gharama kubwa na ili tuweze kwenda vizuri hospitali nzuri zinajengwa, madawa yaendeleo kuja, lazima Watanzania tuchangie kwenye huduma za afya kwa kujiunga na bima ya afya,"

"Lakini bima ya afya ni usalama wa kila mmoja wetu niwaombeni sana wakati wa mavuno ni mara moja tu kwa mwaka unachukua bima yako wewe na familia yako unatibiwa mwaka mzima," alisema Mhe. Rais.



Maandalizi yaliyofanywa na NHIF katika kutekeleza suala hili



Akizungumzia maandalizi yaliyofanywa na Mfuko wa Taifa wa Bima ya Afya (NHIF), Mkurugenzi Mkuu wa Mfuko wa Taifa wa Bima ya Afya, Bw. Bernard Konga amesema kuwa, kwa kutambua jitihada kubwa zinazofanywa na Serikali ya Awamu ya Sita, tayari Mfuko umeshafanya maandalizi ya kutosha ya kuhakikisha unahudumia wananchi wengi Zaidi.

“Kwanza kabisa nimpongeze sana Mheshimiwa Rais wetu Dkt. Samia Suluhu Hassan kwa namna alivyoweka nguvu katika suala la bima ya afya kwa wote, sisi kama mdau mkubwa katika kutekeleza suala hili tumejipanga na kwa sasa tumewekeza zaidi katika utoaji wa elimu hususan ya kuwaandaa wananchi kujua umuhimu wa bima ya afya na kujiunga na Bima ya Afya,” alisema Bw. Konga.

Akizungumzia utayari wa utoaji wa huduma kwa kundi kubwa la wananchi, amesema Mfuko umeimarisha mifumo yake ya TEHAMA ili kuwezesha utambuzi wa wanachama, upatikanaji wa huduma kwa haraka wanapokuwa katika vituo vya kutolea huduma na malipo kwa watoa huduma kwa wakati.

“Tumeendelea kuboresha huduma zetu kwa kuongeza mtandao mpana wa vituo vya kutolea huduma ili mwananchi anayejiunga na NHIF, aweze kunufaika na huduma hizo kwa wakati anapozihitaji,” amelezea.



Kutokana na hayo, ametoa wito kwa wananchi kujiunga na NHIF, kupitia Ofisi zilizoko kila Mkoa Tanzania Bara na maeneo ambayo Mfuko umekuwa ukiweka kambi za uhamasishaji wananchi.

“Ukiwa na kadi ya NHIF, una uhakika mkubwa wa kupata huduma wakati wowote na popote nchini, kwa upande wetu tumejipanga kuhakikisha tunawafikia wananchi kuwahudumia,” amesisitiza Bw. Konga.

